

<http://ugtg.org/~apache/spip.php?article1170>



# Jénès Kont Pwofitasyon (JKP) déklaré : Jenn Gwadeloup lè la rivé !

- Dossier spécial LKP - Secteurs mobilisés -



Date de mise en ligne jeudi 26 novembre 2009

---

Copyright © UGTG.org - Tous droits réservés

---

Déklarasyon a mouvman Jénès Kont Pwofitasyon ki owganizé on sanblé mewkrèdi 18 a mwa novanm an lokal a téren Sionis, Zabim'. On kontré pou prezanté sans é lespri a kréyasyon a mouvman la sa ; men osi an mémwa é omaj a asasina a Charles Henry SALIN. Charles Henry SALIN, on jenn liséyen Gwadeloup kè on jandam' asasen nonmé Michel MAAS ekzékité on swa an ba pon a Chovel, la L'ADGUPS yé aktyelman, alòs kè i té sòti o sinéma é téka rantré a kouché. An giz dè kondanasyon, léta fwansé pa kontanté'y mandé tribinal ay akité asasen la, men mandé osi lawmé ay ba Michel MAAS on pwomosyon...



Jenn Gwadeloup lè la rivé ! An nou aji avan twota maré nou ! Sityasyon-la grav pou jénès an nou !

## « Keskiyanna ? »

On jénès ki normalman dwèt-èt reprézanté dèmen an péyi ay, on jénès ki pou vin gran fanm é gran nonm a dèmen, on jénès ki pou reprézanté fòs a travay, on jénès kon admiral ka di, ki dwèt-èt fòs a péyi-la. Sé li menm ki jodila ka hélé mizè é dezèspwa « an pa ni hak a pèd an la ka surviv ».

## Sityasyon la vrèman grav ! « Ola nou soti ? Ola nou kay ? »

Diféran trip ka tchouyé jénès an nou :

- Ti manni fennyàn an nou la
- Manni fè lékol dèyè tablo-la
- Pa sav ki moun nou yé é enki adopté tout mès é labitid étranjé (sa yo ka kriyé « aliénation »)
- Yo fèmé nou adan diféran lajol : alkòl, dwog, vyolans, chomaj... é nou lésé nou alé adan
- On jénès oubliyé ki ka sibi enjistis
- Lajan ka fè défo
- Nou pèd valè a nonm
- Mank dè motivasyon pou pran péyi-la an men padavwa yo fè nou kwè nou pa kapab

## Jénès Kont Pwofitasyon (JKP) déklaré : Jenn Gwadeloup lè la rivé !

---

- Yo fè nou konprann sa pli bèl réisi tousèl « konplo a nèg sé konplo a chyen » é « sé zanmi ki fè si krab pa ni tèt »
- On jénès ki lè' y vlé rivé a bout i ka rètrouvè-y tousèl é ki bizen tann « kontinyé goumé zanmi ! » é dot ankô...

Mésyé gèy vi an nou ! Gèy jénès an nou ! « ki wol sa menm ? » Nou las épi sitiyasyon lasa ! Sé poussa **JKP** ka bay la vwa jodila. I lè pou nou responsabilizé nou é poussa nou bizen :

- Afiwmé nou rètrouvé nou é fè yo rèspèkté nou. Jodila, nou las atann si moun,
- On lédikasyon adapté a kilti an nou é istwa an nou,
- Fè konsyans maché,
- Konnèt nou,
- Rètwouvé on lawmoni,
- Vin nonm é fanm doubout,
- Woupwan konfyans adan nou, adan pèp an nou, adan divini an nou é ta péyi an nou.

## Nou vlé vwè pèp-la lévé ! « Ka-y di ? Ka-y ka fèt ? »

**Objektif an nou :**

1. Sé ké kréyé on lékòl mawon pou pé rèspansabilizé jenn gwadeloupéyen,
2. Ranfowsé solidarité,
3. Kréyé on rézo a guadeloupéen,
4. Aprann on jenn a afiwmé-y an tan kè guadeloupéen pou-y pé pran péyi ay pou ta-y
5. Kréyé on sendika a étidyan, liséyen, koléjyen
6. Kréyé dé manifestasyon kiltirèl artistik spowtif adan lèspwi JKP pou mèt jénès la a lonè é sa osi adan lé médyà (radyo, télé, entèrèt)
7. Nou pati pou goumé Kont Tout Pwofitasyon ! Jènn chomè é travayè ka sibi (diskriminasyon a lanbòch, pwoblèm pou enséré an sosyété-la...)

**Pou sa nou bizwen fòs, nou bizwen zòt, nou bizwen jénès a péyi lasa !**

Lapwent, 18-11-09

**J.K.P.**